

UDHËZIM
Nr.13, datë 27.2.2008

**PËR ÇELJEN DHE MËNYRAT E FUNKSIONIMIT TË LLOGARIVE LIKUIDUESE TË TË
ARDHURAVE DHE SHPENZIMEVE PËR ADMINISTRIMIN E PASURIVE TË
PALUAJTSHME TË SEKUESTRUARA NË KUADËR TË LIGJIT NR.9258, DATË 15.7.2004
“PËR MASAT KUNDËR FINANCIMIT TË TERRORIZMIT”**

Në mbështetje të pikës 4 të nenit 102 të Kushtetutës së Republikës së Shqipërisë, ligjit nr.9258, datë 15.7.2004, vendimit të Këshillit të Ministrave nr.140, datë 13.2.2008 “Për mënyrën e administrimit të pasurive të paluajtshme të sekuestruara në kuadër të masave kundër financimit të terrorizmit”,

UDHËZOJ:

1. Ministri i Financave është autoriteti i vetëm, i cili do të autorizojë çeljen e llogarive të veçanta për çdo subjekt të sekuestruar.

2. Agjencia ia bën kërkesën Ministrit të Financave për çeljen e llogarisë në një bankë të nivelit II, në mbështetje të urdhrit të sekuestrimit të lëshuar nga Ministri i Financave.

3. Në llogaritë e hapura në bankat e nivelit II për çdo subjekt për të cilin ka dalë urdhri i sekuestrimit dhe janë në administrim të Agjencisë për Administrimin e Pasurive të Sekuestruara dhe të Konfiskuara do të derdhen të gjitha të ardhurat që krijohen nga administrimi i tyre.

4. Këto llogari do të qëndrojnë të ngrira dhe do të preken për shpenzimet e administrimit me kërkesë të kryeadministratorit të Agjencisë për Administrimin e Pasurive të Sekuestruara dhe të Konfiskuara dhe aprovim të tyre nga Ministri i Financave apo i autorizuari i tij. Këto llogari mund të preken gjithashtu për shpenzime të tjera të lejueshme në zbatim të nenit nr.21 të ligjit nr.9258, datë 15.7.2004 “Për masat kundër financimit të terrorizmit”.

5. Agjencia cakton personin përgjegjës për evidentimin e të gjitha veprimeve monetare dhe veprimeve të tjera me pasuritë në kartela të veçanta të secilës pasuri.

6. Shpenzime të administrimit janë shpenzimet për ruajtjen, mirëmbajtjen, publikimin e ofertave të qirasë dhe sigurimin e domosdoshëm të pasurive.

6.1 Këto shpenzime bëhen vetëm atëherë kur pasuritë nuk janë të dhëna me qira apo huapërdorje dhe do të njihen mbi bazën e kërkesës së bërë nga administratori i pasurisë për kryeadministratorin e Agjencisë për Administrimin e Pasurive të Sekuestruara dhe të Konfiskuara dhe autorizimit të kryerjes së tyre nga Ministri i Financave.

6.2 Për pjesën e shpenzimeve të administrimit që lindin nga përdorimi i ambienteve të përbashkëta të pasurive të paluajtshme të sekuestruara, të kushtëzuara për funksionimin normal të ambienteve, do të urdhërohen nga Ministri i Financave duke zbatuar dispozitat ligjore në fuqi mbi administrimin e ambienteve në bashkëpronësi.

7. Për nevoja të ruajtjes së objekteve Ministria e Financave kontraktin subjekte të licencuara e të specializuara për këtë qëllim. Kontrata e shërbimit është 1-vjeçare dhe kontraktori i kryen shërbimet sipas kërkesës së Agjencisë për Administrimin e Pasurive të Sekuestruara dhe të Konfiskuara. Procedura për përzgjedhjen e kontraktorit do t’i referohet pikës 4.b të kreut IV të rregullores së prokurimit publik, miratuar me vendimin e Këshillit të Ministrave nr.1, datë 10.1.2007.

8. Për nevoja të mirëmbajtjes së pasurisë, shpenzimet e kërkuara nga administratori i pasurisë do të kryhen pas marrjes së miratimit nga Ministri i Financave për procedurën që do të ndiqet për përzgjedhjen e kontraktorit. Këto kontrata lidhen rast pas rasti, në varësi të nevojave të mirëmbajtjes së pasurive.

9. Shpenzimet për publikimin e ofertave të qirasë janë pagesat për njoftimet në shtypin e përditshëm kombëtar. Mënyrat e këtij publikimi caktohen nga Ministri i Financave.

10. Shpenzime të sigurimit të domosdoshëm të pasurive janë shpenzimet për sigurimin nga zjarri, tërmeti dhe eksplozioni. Këto shpenzime do të kryhen rast pas rasti pas marrjes së miratimit nga Ministri i Financave.

11. Pagesa për shpenzimet e përmendura në pikat 6,7,8,9,10 më sipër bëhet në përputhje me pikën 5 të kreut II të Vendimit të Këshillit të Ministrave nr. 140, datë 13.2.2008 “Për mënyrën e

administrimit të pasurive të paluajtshme të sekuestruara në kuadër të masave kundër financimit të terrorizmit”.

12. Administrimi i llogarive dhe çdo aktivitet tjetër i Agjencisë për Administrimin e Pasurive të Sekuestruara dhe të Konfiskuara është subjekt i auditimit të Drejtorisë së Auditimit të Ministrisë së Financave.

13. Mbyllja e këtyre llogarive bëhet me urdhër të Ministrit të Financave.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I FINANCAVE
Ridvan Bode

